

# Adschee Schitzehof!

In de nächst Woch werdd de Schitzehof abgerisse: Adschee Schitzehof, ich werr dich nie vergesse! Awwer flenne werr ich desweeche nit, naa, iwverhaupt nit, obwohl ...

Weil ess iss joo nit nor dass e Gebäude abgerisse werdd, dess Haus iss joo voll mett Erinnerung, nit nor von mir. Mir, die jetzt e bissi älter sinn, warn joo aach emol jung, unn wo hawwe merr uns ausgedobt? Im Schitzehof onn Fassenacht!

Heit, wo die Knoche iwverall weh due, kann merr sichs gar nimmi vorstelle, onn Fassenacht somsdaachs unn mondaachs von owends siwwe bis moins um zwaa odder drei Uhr gedonzt se hawwe. Villeicht hott merrs aach so long beim Donze ausgehalle, weil merr immer widder enuff uff die Empor iss, ins Gepäcknetz, wie moncher heit noch saache dut, in die Sektbar also, wo merr mettere Amanda odder Kunigunde – und dess war nor gonz selte die eiche Fraa – ooner odder aach drei gedrunke hott, wo merr geturtelt unn geschmust hott – awwer immer donn, wenn merr e bissi näher zu dene Maske hiegericht iss, gonz noh onn glänzende Aache unn enn lachende Mund, unn wisse wollt, wo merr sich emol treffe kennt, hott merr geheert: Bilde still, doo driwwe hockt moin Monn! – unn im selwe Moment hott der von soim Geecheiwwer gesaat krieh: Bilde still, doo driwwe hockt doi Fraa!

Unn dann, so geeche vier odder fünf, hawwe merr mitte uff de Donzfläch uffem Boddem gesetze unn hawwe gesunge, so wie onn der Fassenacht, onn die ich mich moi Lewe long erinnern due, wo merr, jeder e Tass voll Gulaschsupp vor sich unn enn Löffel in de Hond, unner de Stimmführung vom Superfassenachter Jochen Kunz dess scheene Lied gesunge hawwe: „Mir mache dorch biss moie frieh unn singe Bums-Vallera!“ Odder so ähnlich.

Mir warn enn verschworene Haufe unn hawwe uns iwver Johre immer widder getroffe, awwer monchmol sinn aach neie Leit dezu kumme, die hawwe sich dezugesetzt unn monchmol hott merr doodebei aach Freundschaften fers Lewe geschlosse.

Ach, die Maskeball im Schitzehof! Awwer merr kennt jetz frooche: Unn, iss dess alles wo de dich droo erinnern dust? Naa, alles nit, awwer onn die Maskeball gonz besonnens. Vill von dene Leit, die doomols debei warn, sinn schunn long nimmi, unn trotzdem bleiwe se in Erinnerung, so wie se doomols warn, so jung unn so voll Lewe, unn ich heer se heit noch lache unn schwätze unn pischbern unn singe, im Schitzehof beim Kättche unn beim Jakob Singer.

Bald iss dort e groß, frei Fläch, unn die junge Leit, die dort stehe bleiwe unn gucke, die saache: „Es wurde ja auch Zeit, dass dieses auffällige Haus abgerissen worden ist; seitdem der Chinese raus ist ist ohnehin dort nichts mehr los. Ja, das Amateur-Theater hat dort gespielt, aber die bekommen ja jetzt eine Kulturscheune, schön und modern.“ Unn dann gieh die junge Leit weider unn kooner von dene waaß, dass mett jedem Backstoo, der abtransportiert worrn iss, e Stichelche Alt-Flerscherm verlorn gonge iss, awwer unserooner bleibt stieh unn und sächt: „Adschee Schitzehof!“ Unn die Erinnerung stelle sich oi, unn dann gieht merr unn nimmt se mett, die Amanda unn die Kunigunde unn ihr glänzende Aache unn ihrn lachende Mund – unn lächelt in sich enoi iwver e Treffe, dess nie stattgefunde hott. Odder doch? Dann habb ich grad dess vergesse.

Eiern Honnes